

# Ils Dis da litteratura raquintan

■ (cp) Dals 2 als 4 da november han lieu ils 22avels Dis da litteratura a Domat en la halla Tircal. Il program da quest onn stat sut l'ensaina da la litteratura orala: «Fantisar, fabular, raquintar ... e tadlar!» è il motto da quest onn. «Tge datti da raquintar?» Quai è la dumonda da partenza dals organisaturs dals Dis da litteratura 2012. I vegn raquintà bler quest onn a Domat dals 2 als 4 da november. Il cumenzament fa questa giada dentant betg in giastatur, mabain ina giast-raquintadra: *Bea von Malchus*. L'artista da Freiburg en Germania vegn a manar il public da Domat en il Veder Testament. Ses program «Bibelfest!? – Das Schönste aus dem alten Testament» è in teater raquintà divertent, intelligent e forsa betg dal tut sontg cun istorgias or dal pli renumà best-seller da tut ils temps.

La sonda en damaun cuntinua cun il tema fabular: *Anna Ratti* preschenta ses cudesch «L'üsch nair» cun paraulas ed istorgias naschidas en la tradiziun dals temps vegls cun personas da noss temp. Novas istorgias datti era da la figura Gion Barlac da *Theo Candinas* – u almain en ina nova furma: L'autur dat in'invista en il nov cudesch auditiv da la Chasa Editura Rumantscha «Historias da Gion Barlac» ed en ses pli nov cudesch «Reminiscenzas ed impressiuns d'in cuort interval terreste». Silsunter discutan *Philip Ramming* ed *Arnold Rauch* ensemen cun *Flurina Badel* da las istorgias en lur vita e davart il raquintar istorgias.

## Raquints en lur diversas furmas

La sonda saira sa deditgescha a las istorgias en lur differentas furmas: ditgas e parau-

las, poesias ed anecdotes, sgnoccas e famas, istorgias da chatscha, istorgias d'amur e da sgarschur vegnan raquintadas, prelegidas e chantadas. Da la partida èn tranter auter *Plasch Barandun*, *Gion Mathias Cavelty*, *Adolf Collenberg*, *Göri Klainguti*, *Letizia Sonder* ed auters che vegnan accompagnads musicalmain da *Salome Nold* e *Laura Zangger*. Quels che na pon quella saira betg esser da la partida a Domat pon tadlar las istorgias al Radio Rumantsch che emetta quella saira en lingua directa da Domat.

Radiotelevisiun Svizra Rumantscha lascha raquintar anc en autras emissiuns: da la halla Tircal a Domat emetta la Televisiun Rumantscha live dal «Studio litterar» per l'emissiun *Cuntrasts* e *Hardy Ruoss*, *Clà Riatsch* ed *Esther Krättli* s'inscuntran

era quest onn sin il palc a Domat per discutir davart cudeschs ed istorgias al «Tavulin litterar» dal Radio Rumantsch.

## Novas ediziuns

Als Dis da litteratura na dastgan betg mancar las vernissaschas. Quest onn datti da festivar quatter ediziuns resch novas. La sonda avant mezdi vegn preschentada la nova ediziun da la Surselva Romontscha cun columnas or «Da la vita da Ludmilla Cahenzli». La sonda suenter mezdi preschentan *Mevina Puorger* e *Dumenic Andry* «La glieud da Schilana ed oters raquints» da *Balser Puorger* e la saira tard a la bar datti buccadas da la gasetta da giuventetgna «Punts» a chaschun da la nova ediziun «Best of Punts» che cumpara en la Chasa Editura Rumantscha. La dumen-

gia en damaun po l'Uniun per la Litteratura preschentar la nova ediziun da la rescha «Litteratura», numnadamain la Litteratura 31 cun il titel «Litteratura e musica – A la tschertga dad atmosferas».

Texts novs po il public er udir en la concorrenza litterara Premi Term Bel. Quatter texts èn sa qualifitgads per la prelecziun a Domat, nua ch'ina giuria vegn a discutir publicamain davart ils texts la sonda suenter mezdi. Fin a la surdada dal premi la dumengia da mezdi datti dad udir, leger, raquintar, fantisar e fabular anc en numerusas autras prelecziuns da las novas ediziuns rumantschas.

Ils 22avels Dis da litteratura dals 2 als 4 da november 2012 en la sala Tircal a Domat. Infurmaziuns davart il program sin [www.litteraturarumantscha.ch](http://www.litteraturarumantscha.ch).



Il program dals Dis da litteratura da quest onn stat sut l'ensaina da la litteratura orala: «Fantisar, fabular, raquintar ... e tadlar!» MAD